

დავით ბალკალიანი - ის, რომ ხვალ იდან სამღვდელოებისთვის დავით გარეჯის კომპლექსის ფარგლებში არსებული ეკლესიები გაიხსნება, სწორედ გიორგი გახარიას და ილჰამ ალიევის შეხვედრის შედეგია



საქართველოსა და აზერბაიჯანის რესპუბლიკებს შორის სახელმწიფო საზღვრის დელიმიტაციისა და დემარკაციის კომისიის მომდევნო სხდომა, სავარაუდოდ, საქართველოში ჩატარდება, - ამის შესახებ მთავრობის სხდომის დასრულების შემდეგ საგარეო საქმეთა მინისტრმა დავით ბალკალიანმა განაცხადა.

მინისტრის ინფორმაციით, აზერბაიჯანული მხრიდან მზაობა აღნიშნულ საკითხზე უკვე დაფიქსირდა.

„გრძელდება მუშაობა სადელიმიტაციო კომისიის ფარგლებში. კარგადაა ცნობილი, რომ ამ პერიოდის განმავლობაში ჩატარდა ექსპერტების შეხვედრა, იყვნენ ადგილზეც, შეისწავლეს გარემოება, მოხდა რუკების დადარებაც. კომისიის პირველი სამუშაო

შეხვედრა შედგა ბაქოში და არის მზაობა, რომ შემდეგ უკვე ჩვენი აზერბაიჯანელი კოლეგები საქართველოში გვენვიონ და სწორედ აქ გაგრძელდება შემდგომი დისკუსია დელიმიტაციის ფარგლებში“,- განაცხადა დავით ბალკალიანმა.

მან მიმოიხილა აზერბაიჯანში საქართველოს პრემიერ-მინისტრის პირველი საგარეო ვიზიტი და აღნიშნა, რომ დელეგაცია საქართველოში მნიშვნელოვანი ხელშესახები შედეგით დაბრუნდა, რომელის მიხედვითაც ხვალიდან სასულიერო პირებისთვის დავით გარეჯის კომპლექსის ფარგლებში არსებული ეკლესიები გაიხსნება.

„ჩვენ მნიშვნელოვანი ხელშესახები შედეგით დავბრუნდით და ეს ილჰამ ალიევისა და გიორგი გახარიას ორმხრივი შეხვედრიდან გამომდინარეობს. ძალიან გულწრფელი საუბარი იყო ყველა ძირითად მიმართულებაზე და მნიშვნელოვანია, რომ ჩვენი აზერბაიჯანელი პარტნიორების მხრიდან გვაქვს გაგება ამ მიმართულებით. სწორედ ამ შეხვედრის ერთ-ერთი მნიშვნელოვანი შედეგი გახლავთ ის, რომ დავით გარეჯის სამონასტრო კომპლექსში არსებული სამონასტრო კომპლექსებისკენ მიმავალი გზა გაიხსნება. ჩვენ ასევე შევთანხმდით, რომ ნაბიჯ-ნაბიჯ წავინევთ წინ. გამომდინარე იქიდან, რომ პრობლემა არის ძალიან მგრძნობიარე, საბჭოთა პერიოდიდან გვერგო უმძიმესი მემკვიდრეობა, რომლის გადაწყვეტაც ასე სწრაფად ვერ მოხდება, ამიტომ მთავარია, რომ ის არსებული დაბრკოლებები, რომელიც ბოლო პერიოდში წარმოიქმნა, დაუყოვნებლივ მოვხსნათ. კარგია, რომ ამ შეხვედრის შედეგად მივაღწიეთ ამას და მნიშვნელოვანია, რომ კიდევ ნაბიჯ-ნაბიჯ წავინიოთ წინ და ყველა დაბრკოლება აღმოვფხვრათ“, – განაცხადა დავით ბალკალიანმა.

მისივე თქმით, ხვალიდან დავით გარეჯის კომპლექსის ფარგლებში არსებული ეკლესიები გაიხსნება სამღვდველოებისთვის, შემდეგ უკვე განიხლება შემდგომი ნაბიჯები, თუ როგორ უნდა მოხდეს ამ სივრცის გახსნა მომლოცველებისთვის.

- ipn.ge